



記「102 年全國中小學客語藝文競賽-中區初賽」

成過个「全國客語生活學校成果觀摩賽」，在今年轉型做比賽个形式。毋係觀摩定，係愛提出實力來拚喔。逐個參賽學校攏拚盡氣力來準備。第一屆个比賽，堵好得雲林縣接手來辦。佢打幫著這個機會擔任客語口說藝術類現場个工作人員，紹介比賽各隊討比个內容。在比賽進前，佢即先對逐隊个題目量早準備好。到時唸出來正毋會漏氣。

比賽遐日，佢打早即到位東南國中和文昌國小，這時務有一兜工作人員先來了。大家攏緊拏會場擺得佢更加好勢，準備接待來比賽个選手。時間到位个時，來了真多人，參賽个學校一隊接過一隊。睭著佢人逐個攏係準備好勢正來个，毋管係衫褲、表演个傢伙頭，抑係精神攏得人感覺氣勢十足。

比賽个種類有「客語歌唱表演類」、「客語口說藝術類」、「客語戲劇類」三種。現場攏有錄影，拏精彩个比賽記落來。口說藝術比賽个學生，比个題目有提客事諺語來講，有環保、交通安全、客家獅頭、食蔬果保康健、義民爺、教育、科技生活等等。比賽个細子有人用畚擔擔一對米籬表演，實在真心色。在這兜表演內底，得人睭著希望。這兜細子，客事係講著恁順，表演係恁精彩。嘛得佢人睭著先生个用心和付出。

比煞口說藝術部分，佢嘛去睭唱歌个比賽，臺上比个人唱了精彩，聽个評審嘛聽了用心，有傳統个歌，嘛有創新个歌，尤其係幼兒園細子唱著全然得人惜。唱歌个水平一息仔攏毋會輸電視个唱歌比賽，可見成過客語生活學校成果觀摩賽對客事教學、客語个推廣有真大个效用。

客語戲劇个比賽更加精彩，逐隊攏用盡頭腦準備好表演个傢伙頭，愛會講，嘛愛會曉表演。內底愛有客家諺語，嘛愛有教育个意義，又愛心色餵人睭，實在係無簡單。在這場比賽內底，睭著合作个精神，聽著無共款个客事，印證臺上一分鐘，臺下十年功。學會曉接納無共款个文化，拋棄成見，用廣闊个心來睭這個世界。

作者：李秉璋

☆詞彙學習☆

【量早】liong zooˊ：盡早，提前。

【漏氣】leu kiˊ：原為吹牛皮漏氣。引申為丟臉、出洋相、出糗。

【攏緊】lanˊ ginˊ：趕快。

【接過】：ziabˊ gooˊ：接著。

【傢伙頭】gaˊ fooˊ teuˊ：工具、器具，有時也指武器。

【畚擔】bunˊ damˊ：扁擔，通常用竹子作材料，將其截段剖半，而兩頭保有一卡榫，使挑物時能更加牢固，是昔日農村家家必備之物。

【米籬】miˊ looˊ：用竹子編製而成的方底突腹圓口容器。用來盛裝稻穀、花生等農產品。高寬各約 40~50 公分。農民通常用扁擔搭配米籬挑農產品。

【水平】fiˊ piangˊ：水準。

【一息仔】rhidˊ sudˊ aˊ：一點點、一些些。也可說成一兜仔。

【效用】hau rhung：效果，作用。